

一
是
紀
始



一
卷
紀
略



壹是紀始人品稱名類卷之五

荆南新化祝亭魏崧著

人物之生始於盤古

述異記南海中盤古國皆以盤古爲姓昉按盤古氏天地萬物之祖也然則生人物始於盤古又吳楚間說盤古氏夫婦陰陽之始也徐整三五歷紀天地混沌盤古生其中一萬八千歲天日高一尺地日厚一尺盤古日長一尺故一萬八千歲

姓始於太昊

唐張說曰上古無姓如夷狄然自炎帝之姜黃帝之姬因所
生地而爲姓按長編上古男女無別太昊始制嫁娶正姓氏
姓者統其祖考之所自出氏者別其子孫之所自分則姓始
於太昊故伏羲風姓鄭樵氏族畧曰三代之前姓氏分而爲
二男子稱氏婦人稱姓氏以別貴賤貴者有氏賤者有名無
氏姓所以別婚姻故有同姓異姓庶姓之別三代之後姓氏
合而爲一皆所以別婚姻而以地望明貴賤於文女生爲姓
古女之字多從女如姬姜嬴姒姚嬀姑妘媯嬭之類是
也明洪武初吳沈奉旨撰千家姓得姓一千九百六十八

姓氏譜始於漢

漢志春秋家世本十五篇隋志漢初得世本竊黃帝以來祖
世所出言姓氏皆本世本劉向曰世本古史官明於古事者
所記古三墳有姓紀一篇晉杜預作世族譜

譜牒始於周

周禮小史定世系辨昭穆治世譜而差序秩第漢溝洫志大
司空掾王橫引周譜云定王五年河徙如淳曰世統譜牒也
此卽譜牒所自始後漢百官志宗正注胡廣曰又歲一治諸
王世譜差序次第會要唐開元二年六年修玉牒官李衢等

奏竊以聖唐玉牒與史冊並區立號建名期於不朽伏乞特
創嘉名以光帝籍遂敕以皇唐玉牒爲號

改姓氏始於吳

左傳哀十一年注爲王孫氏亦猶夫槩王奔楚爲堂谿氏戰
國范雎奔秦改姓曰張名祿則范雎不但改姓并改名後世
改名始於此

改姓始於唐

唐憲宗名純詔姓淳于者改姓于舊唐書阿史那忠以擒頡
利功拜左屯衛將軍妻以宗女定襄縣主賜名忠單稱史氏

韓文公集賢校理石君墓誌云其先姓烏石蘭從拓跋魏氏
入夏居河南遂去烏與蘭獨姓石氏唐肅宗上元二年詔氏
姓與俗諱及隱疾同聲者宜改

賜姓始於太皞賜國姓始於漢

禮記正義鄭駁異義云炎帝姓姜太皞所賜黃帝姓姬炎帝
所賜故堯賜伯夷姓曰姜禹姓曰姁契姓曰子稷姓曰姬至
漢高祖五年封項伯等爲列侯賜姓劉氏又以婁敬爲郎中
賜姓劉氏漢武帝賜夷人休屠王太子曰殫金姓以休屠王
作金人以祭天主故以金賜曰殫姓

冒姓始於漢

漢書外戚恩澤表扶柳侯呂平以皇太后姐長姁子侯是時
太后方封呂氏故平以姊子冒呂姓而封史記灌夫傳父張
孟爲潁陰侯嬰舍人得幸因進之至二千石故蒙灌氏姓大
宛傳堂邑氏故口奴甘父服虔曰堂邑姓也師古曰堂邑之
奴本口人名甘父取主之姓以爲氏而單稱其名新唐書元
載父景昇爲曹明妃元氏掌田租請於妃冒姓元氏

五音族姓始於黃帝

爾雅翼古者司商協名姓人始生吹律合之定其姓名黃帝

吹律定姓唐呂才云堪輿經黃帝對天老有五姓之言此姓屬五音所自始

衍派始於宋

宋高宗無嗣曰朕止於伯字行中選擇庶幾昭穆順序乃選孝宗及宗子伯浩入禁中紹興四年又得東義卽子彥之子伯玖入宮中明洪武同姓派定二十字若親王生子或生孫卽上聞下宗人府依派立雙名每一世取一字爲上字如所派高瞻祁見祐厚載翊常由慈和怡伯仲簡毅迪先猷是也其下一字從水木火土金相生字類

同姓通譜始於晉

晉書石苞傳曾孫模滅於寇石勒以與模同姓俱出河北引
模爲宗室特加優寵位至司徒

宗譜族譜始於宋

周禮太宰宗以族得民自封建廢宗法不立而氏族混因有
世譜官掌之唐宋以來世譜漸散宋歐陽修宗譜遠及可知
之始祖用以五爲九之法五世一提九世再提始祖詳其所
出至於五世而提則獨詳其本支之祖所自出於同宗之中
寓別族之意此所謂宗譜也蘇氏之譜則以作譜者爲斷由

高祖而下詳其所出高祖以上則不及以其親盡也其法曰
凡嫡子而後得爲譜爲譜者皆存其高祖而遷其高祖之父
世世存其父人之譜無廢也而其不及高祖者自其得爲譜
者之父始而存其所宗之譜又著其說曰古者有大宗有小
宗凡今天下之人惟天子之子與始爲大夫者而後可以爲
大宗其餘則否獨小宗之法猶可施於天下故爲族譜其法
皆從小宗故蘇氏之譜曰族譜其見於譜皆有服之親也其
實歐蘇二家小異大同皆使人各自爲譜而各詳其宗至明
歸崑山之譜自始祖以下其世次名諱靡不詳載其說以爲

皇朝通志卷之三十
五
不必定以宗法而宗法寓乎其中此則所謂大宗譜也今之
爲譜者大率從此

君臣始於人皇

易通卦驗注云政教君臣起自人皇之世劉恕外紀天皇氏
一姓十三人繼盤古氏以治兄弟各一萬八千歲時尙未有
君臣定制禮記正義尊卑之禮起於燧皇燧皇者人皇氏也
朝廷始於唐堯

列子堯治天下五十年不知天下治歟不治歟問外朝外朝
不知

天子始於神農

前此王天下者祇稱氏春秋元命苞安登生子人面龍顏始
爲天子之稱帝王世紀神農氏母有蟠氏之女名曰安登
天子稱皇帝命稱制令稱詔自稱朕始於秦

皇帝之稱見於呂刑天子尙未以之自稱也史記秦王初并
天下自以爲德兼三皇功過五帝乃更號曰皇帝命爲制令
爲詔朕則專作帝稱制者王者之言必爲法制也漢時有制
詔親詔密詔特詔優詔中詔清詔手筆下詔遺詔恩澤詔書
寬大詔書一切詔書及哀痛之詔隨事名之

龍馭始於黃帝

世傳黃帝鑄鼎成有龍垂髯下迎帝騎龍上天羣臣後宮從者七十餘人小臣不得上悉持龍髯髯絕墜乃迎攀莫及抱弓而號因名其地曰鼎湖弓曰烏號

稱君曰上始於戰國稱聖上始於漢稱皇上始於後魏稱陛下始於秦

莊子今處昏上暗主之間史記封禪書則稱御世者曰今上漢藝文志孝武世書缺有間聖上喟然歎曰朕甚憫焉後魏元遙傳遙以本服絕應除屬籍乃表云臣去皇上雖是五世

之逢史記秦始皇置酒咸陽宮僕射周青臣進頌曰陛下神聖

萬歲稱君如於漢

萬歲時人慶幸之通稱呂氏春秋宋康王飲酒室中有呼萬歲者堂上悉應戰國策馮煖以責賜諸民因燒其券民稱萬歲至漢賈誼著新書十一篇每奏一篇帝稱善左右呼萬歲漢武帝東巡浮大海登岱宗聞山呼萬歲者三始制舞蹈之儀羣臣朝賀皆呼萬歲後漢書韓稜傳竇憲有功還尙書以下議欲拜之伏稱萬歲稜正色曰夫上交不譙下交不瀆禮

無人臣呼萬歲之制議乃止唐制大朝賀羣臣舞蹈呼萬歲
明制大朝賀三舞蹈外替唱山呼百官皆呼萬歲又唱山呼
曰萬歲唱再山呼曰萬萬歲

卽位覃恩始於宋

宋英宗濮安懿王之子也仁宗慮無嗣養宮中及卽位覃恩
天下大臣百官並進秩得貤贈於存亡父母宗室諸王亦畢
加封贈

國號稱朝始於夏

外紀禹受命都安邑國號夏蓋自舜以前祇稱氏故循裴紀

二十氏因提紀十三氏禪通紀十八氏疏佐紀十七氏五帝紀皆稱氏至夏始以朝稱又少昊之前天下之號象其德如有巢燧八是也顓頊以來天下之號因其名如高陽高辛陶唐有虞皆所與之地顓頊帝嚳堯舜皆以字爲號上古質樸故也

人主服黃始於隋

考竹書紀年黃帝三十年景雲見帝黃服齋於中宮坐於元扈韓詩外傳黃帝服黃衣冠黃冕致齋於宮時第以爲齋服隋開皇元年秋七月定服色始服黃遂永爲制